

拜
經
樓
詩
集

拜經樓詩集序

余耳海寧吳君槎客名久矣方余備兵浙西聞海塘至尖山槎客迓余道左相見古廟中言所居近欲邀至其家所謂拜經樓者屬以事牽不果往旣而槎客數過余余每邀之游西湖之上流連詩酒極歡前年余移官楚南槎客偕查秀才梅史以詩送余別後往還書問不絕必附以詩綢繆款曲之誠皆見於篇什比今年歸自湖湘同游硤石之東西兩峯游罷輒作詩酬荅如是者余與槎客交亦旣數年而槎客之所謂拜經樓者卒未之至也無何槎客書來啓視則郵拜經樓詩集至凡若干

卷余雖未至拜經樓而先交其人又讀其詩不已如登拜經樓耶槎客善治經故以拜經顏其樓并以名集海內老宿如盧學士抱經王光祿西莊錢宮詹竹汀諸先生槎客皆嘗與之游其可傳當不獨詩今其詩集宮詹序之而槎客復徵序於余者以余實知槎客固不可無言也槎客詩才情飈發詞旨鏗耀至詩之爲道與經學通與夫槎客詩之所以工則見於宮詹之序不復道余故述數年來與槎客交游之雅序而還之槎客老矣不能數數見余方謝病閒居終當詣其廬一登拜經樓再與槎客論詩槎客其許我不

嘉慶七年嘉平月既望無錫秦瀛

拜經樓詩集序

海寧吳君槎客博文瞻學著述等身早歲卽以詩名湖海間旣而聚書數萬卷寢饋其間顏所居之樓曰拜經蓋取東莞臧氏之例樓所儲書百氏具焉獨言經者統於尊也頃歲錄生平古今體詩手自編定爲卷一十有二名之曰拜經樓集寓書求序於予且告曰僕編彙時客有舉滄浪語以相難者謂詩有別才不關於學春華秋實理不得兼賈孔無韻語溫李非經師今子從事於詩而兼好經術吾懼其兩失之也僕未有以應乞予一言以解兩家之結予听然笑曰詩固與經異趣耶未有

經先有詩詩三百篇皆賢士大夫咏歌性情之作自古
有賢士大夫而不說學者乎卽其間有羈人思婦之詞
而聖人取而列之以爲經則皆不詭於經者也經有六
而詩居其一舍經卽無以爲學詩與學果有二道乎哉
先正朱檢討之言曰詩篇雖小技其源本經史別才非
關學嚴叟不曉事斯可謂先得我心者矣古人詩卽爲
經自唐以後乃以小技名之非技之小也詩人自小之
耳風雲月露之狀日出而不窮賢士大夫之才日用而
不竭今之性情由古之性情也何有大小之區分乎槎
客之詩根柢厚而性情正詞必已出而不入於俚俗言

必擇雅而不流於姚冶固將靳至於學人之詩而不詭
於經者也彼哉滄浪子以一孔之智輒議論古人長短
援引禪語熒惑聽者祇見其未嘗學問而已旣以復於
槎客復次其語爲之序云

嘉慶壬戌十月望日竹汀錢大昕書

余幼學爲五七言詩有哂於旁者曰子其窮矣余笑語
客此窮而後工之說也而亦知歐陽子所謂窮乎其人
蓋嘗薄宦有祿於朝由醢雞之獲窺之其猶在窮達間
者也若夫建牙持節出入將相亦時焉而已而尚未知
窮而烏知詩比年事益長大見知名之士大率飢寒困
蹶有鬱紆無聊之態米鹽凌雜皆足以汨亂其神明而
摧沮其志氣使之不得專一於所業夫是以窮旣甚矣
而詩之工滋不驗始信乾坤清氣造物者不輕以畀人
以其得之之難知養而成之之尤難也海寧吳先生槎
客早歲卽以詩見知於浙西諸名宿凡浙西之士稱詩

者無不交日推吳先生蓋四十餘年矣先生擁書十萬
卷沈酣偃息於其中梳爬剔抉芒角四出積前後所得
千餘篇常歛然不自以爲工也性耽山水獨攜一童奴
汎舟茗甞或由吳門達於荆溪舟中雜度古書畫鼎彝
佳硯之屬客至則出以相娛間遇勝流與考證古今辨
析疑義停驂輟棹彌日不能去尤汎愛樂易雖窮櫛下
士亦皆敬禮容接之以故士無賢不肖咸樂親先生或
疑太邱道廣要不盡然也昌黎韓子有言上界真人足
官府豈如散仙鞭笞鸞鳳終日相追陪然則當吾世如
先生雖上界神仙之樂不以易之況人間將相苦心勞

神者可得比並乎宜乎詩之不期工而工也予嘗戲語
先生得於天者厚矣又必雕鏤煙月以與世之窮者爭
名且終歲仰屋著書搜採叢殘不貸毫末此空疎淺劣
者之幸自暇逸而胸有千古反不能自適其適也先生
笑而不答曰子姑爲我序之荆溪同學弟張衢拜譔

錄舊藁自序

憶自羈州之歲輒性耽聲詩三百篇而外凡古今諸名家集多方構致日夕沈吟探討幾廢寢饋稍長出與當世詞人學士相游從見往復酬唱之什益心慕之間或竊效其所爲然而少陵氏有言佳句法如何而予於法未有得也老境漸於詩律細而予於律未盡諳也故所作都弗工旋成旋棄或爲人持去便不復措意忽忽數十年來學業頽隳同輩多聚散靡常存歿參半自顧且皤然老矣回思向時文酒之流連與夫人事之遷改欣戚之殊致無異前塵夙夢未嘗不爽焉自失而二三朋

好猶往往能舉其單詞子韻用爲談笑之資噫是亦可
嘅也夫聞之詩以理性情韓子曰性者與生俱生也然
則予之詩以爲不得於法與律也可以爲非性若情之
所寄亦奚可矧夫歲月與之偕往而心力於焉是耗又
烏忍終寘之若孟氏之墮甑哉暇日因從故紙敝簾及
所能憶記者稍事哀香得古近體如干首釐爲如干卷
曰拜經樓詩彙姑藏家塾以眎後人譬諸博奕猶賢乎
已設以爲自來攻是道者恆少達而多窮舉凡予生平
吟嘯侘傺坎坷不得志之所爲而一委之夫詩是則予
之所甘而非詩之所受也

乾隆五十有七年歲次壬子冬十月兔牀山人書於拜
經樓

附書二通

頃晤友人知詩集編定付梓曷勝翹忭大作典雅清麗
洵足藥空疎而式浮靡一起詩學之衰竚望刻竣卽先
覩使讀也

記初白先生有云將來我輩人人有集牽連附書必有
傳者拙作詩藁未能付梓所以亟望大集之刊行也

松霽周春

拜經樓詩集總目

卷一

一起乾隆乙酉盡甲午

古今體詩六十六首

卷二

一起乙未盡丁酉

古今體詩七十首

附詩五首

卷三

一起戊戌盡壬寅

古今體詩一百八首

卷四

一起癸卯盡乙巳

古今體詩七十二首

附 詩三首

卷五

起丙午
盡戊申

古今體詩九十二首

附 詩一首

卷六

起己酉
盡壬子

古今體詩八十四首

卷七

起癸丑
盡乙卯

古今體詩一百二首

卷八

起嘉慶丙
辰盡丁巳

古今體詩九十四首

附 詩一首

卷九

起戊午
盡是年

古今體詩五十九首

卷十

起巳未
盡是年

古今體詩七十八首

附 詩三首

卷十一

起庚申
盡是年

古今體詩八十三首

附 詩八首

卷十二

起辛酉
盡壬戌

古今體詩一百三首

附 詩三首

通計古今體詩一千一十二首

附 詩二十四首

拜經樓詩集卷一

一起乾隆乙酉盡甲午

海寧 吳 騫 槎客

某氏別業

驛路西連睥睨長，
檣舟亭畔勒游韁。
一林紅杏尚書第，
十里青山宰相莊。
雲雨難形生反覆，
恩仇偏要死衡量。
行人爲指荒榛處，
曾聽清歌遶畫梁。

雨夜虎嘯道中

渺渺衝寒路悠悠，
數驛程魚跳春浪闊。
風激暝帆橫戍鼓，
連雲斷離腸帶酒傾。
天涯同此際，白髮幾人生。

祝陵

處仁偉丈夫英臺奇女子三年共游學所契惟書史業
成襁遂判眷言還故里音塵渺旣絕悵悵終何已昔爲
山中雲今作隴頭水會合故無心分流云自此徘徊向
空房顚顚傷羅綺錦書非拙裁若爲附雙鯉飲此長恨
端默默以之死卽今埋玉地冷落窮山趾松柏解同心
楸梧失連理冥漠黃墟間哀湍暮逾駛玉魚亮難畱芳
珮嗟空委情知粉黛假況乃儒冠僂春深巖碧鮮秋晚
蝶衣紫幽魂竟誰招女蘿弔山鬼嘗聞三五月皓月虛
窗裏清商拂瑤徽彷彿調宮徵一鳴萬籟寂再鼓悲風
起天邊有嬋媛粲然啓玉齒無以高山心誤測求凰旨

所前橋

盧九台先生故居在其側

埭曲岡回儼臥龍
橋邊誰復識英雄
千條急澗噴蒼雪
一道寒烟貫白虹
沙鳥猶啣西嶺石
漁舟幾繫故園風
閒來試話君家事
大抵功名逆旅中

山塘卽事

吳山微雨後芳草綠
芊眠十里無塵地
三春有恨天管絃
能醉日羅綺
欲生烟見說梧宮裏
新來更黯然

聞朱笠亭大令之喪歸自阜平詩以哭之

二首

常愁薄宦脂河側
忽漫招魂翰水陽
月下青楓驚夢斷
天邊丹旆拂雲長
遺書尚說餘千卷
清俸何曾滿一囊

此日黃公壚下酒空憑隣笛話淒傷

參差烟樹小園西零落休言舊路蹊鄭草再抽秋已晚
雲亭重到日偏低碑畱故邑悲遺老骨返新阡賴小妻
我亦素車應會客傷心不忍聽烏啼

桃溪歲晚雜興二首

千尺虬龍雪洗青一條寒玉漱溪亭他年盡室荆南去
祇把銅官作畫屏

竹裏柴扉掩夕暉春前臘後足寒威石橋西畔梅初放
有客騎驢薄醉歸

歲初泊舟雙橋拓國山碑連日風雪同舟皆有寒

色戲占一絕示之

紫葢黃旗又一時
殘碑荒蘚最堪思
若教風雪廻孤棹
笑煞孫郎帳下兒

團扇郎

流連復流連
顚顚羞相見
圓如秋中月
潔比凌冬霰
却爲合歡人
清暉銷一半

烏棲曲

闌闌城頭暮
吹角角聲未斷
烏聲續
昨夜梧桐一葉秋
飛入深宮人不覺
舞白苧歌紅蓮
長夜之樂何漫漫
美人醉起更舉酒
笑指陽山爲君壽

江南樂

朝乘木蘭船暮采雙頭蓮蓮葉在江干蓮花入江閣本是同根生如何不同樂

五雜俎 二首

五雜俎機中段往復還彌相戀不得已抽刀斷
五雜俎雙行纏往復還啣泥燕不得已添長線

燕歌行

秋風慄慄白日沈蕭蕭木葉辭中林玉露塗堦蟋蟀吟
相思此夜傷人心歡日苦淺別苦深青驪一逝何駸駸
前年君往天山陰去年雲中寇復侵賤妾熒熒守孤衾

鈞澤不施塵暗簪室中有酒牀有琴爲君斷腸非自今
西飛願託雲間禽千里爲我傳哀音君如青松結遙岑
妾隨草滅安足尋

龜雖壽

神龜雖壽曾不如蜉蝣千秋彼日兮此日千秋苟萬物
其同盡又何舍短而與脩崔巍崔巍置酒高臺今我不
樂來日奚爲哉

紈扇詞

團團合歡扇製作本纖好偶因揮使功出入君懷抱一
朝歸秋篋從此相見少含淒望深殿惟見雙飛燕棄置

亦君恩涼風敢輕怨

擬古

十四首

驅馬登西山顧瞻雒城曲冠蓋沈蒿萊浮雲日相逐中
有孤飛禽自比鴻與鵠矯首青冥邊六翮炫朝旭晨棲
三珠樹夕擬崑邱宿安知天路遙搏扶常不足欲歸迷
故林雲羅紛在目不如燕雀羣恣食野田粟

木落歲方晏寒原暖霏雪凄然感元化當食不能咽美
人阻烟海元珠日淪沒吾道在鴻冥茫茫誰識察

呂梁昔未鑿河水怒奔濤嘗聞此中魚跋浪升青霄鱗
鬣矜得意雲泥誠自超悠悠暴顯翬疇能援其曹君子

重脩業慕義亦論交豈如夸毘子自比漆與膠翻手違
夙心傾敝起一朝不見齊三士殺身以二桃

鬱鬱陵上柏青青澤中蒲岌岌行游子馳騁窮五都抵
掌王侯前意氣讐萬夫片言取卿相顧盼驚里閭竭來
長安陌車騎咽四衢路人竊相謂彼今復誰與士生無
定論利智鈍卽愚鳧鶴終不齊造化孰能踰飛作摩天
翼落爲枯池魚虞卿豈不賢窮愁獨著書

白露泣秋阪蕭瑟日以深元鳥無畱翼蟋蟀當堦吟攝
衣步前除皓月淒盈襟時流不我待華髮忽見侵安得
采瓊蕊暫來崑邱岑宛宛彼姝子玉窗橫素琴一彈鳳

皇操散落瑤華音願言竟此曲此曲感人心賞音邈已
遠涕下誰能禁

我有鹿盧劍流傳自中古呼之飛挾胸壯士色如土世
無風胡子曷免沈埋苦淮陰惡少年跨下何妨侮

馨馨谷中蘭濯濯窗下柳迢迢錦字書戚戚秦川婦與
我一心人離居何永久卉木幾枯榮帷房長獨守人疎
減故懽物棄增新垢不見長門宮嬌寵復何有蒼苔履
綦絕明鏡流塵厚回思金屋言不啻出諸口熒熒望燈
火歷歷陳杯酒獨有李夫人承恩及身後

洛陽三月時芳菲日夜新有梅獨先落欲避桃李塵桃

李非不妍妖艷動四隣那知輕風中轉眼失其春古來
高世士抱素道彌醇三旬九逢食豈不常苦辛於中苟
無嘆榮悴理則均夢周慨魯叟吾衰更誰陳安得杜蘅
草聊以遺斯人

皎皎西山月餘輝照我廬端居觀羣動寤言察盈虛朝
爲天桃子夕是春市徒富貴果何常攬涕增長吁

和風弄天雞東旭剝將開滄溟含一氣呼吸徒喧豗挂
席請茲始東游尋蓬萊道逢容成子乘雲戲九垓姮娥
揚妙音白晳如嬰孩手把青芙蓉邀我金銀臺惟昔秦
皇帝駕海何雄哉一梁役萬夫鞭血殷蒼苔未餌不死

藥威陽已成灰生爲萬乘尊沒爲山鬼吟餘威竟何在
咄爾令心哀

唧唧復唧唧顧影若有失結交空四海愁吟徒一室稽
生作連流不堪尚餘七而我何爲者懶漫不自恤銀漢
清且淺寒至亦云疾牽牛多獨處匏瓜恨無匹人生天
地間志願誰能畢

步出國東門墟里何綿連不知公與侯遺宅此路邊高
甍雜枳棘飛閣巢鴟鳶兔從狗竇入鹿觸罟罟翻借問
道傍叟此人皆奚遷慷慨前致詞鬱鬱盛當年甲第擬
皇居出入傾里鄽身是椒房親子爲侍中官絲竹列後

堂羅綺盈前軒淫樂不知極災患迭相干綠珠覺既啓
黃犬空長歎豪強旋銷滅骨肉成灰烟始知此第宅本
是貧民田禍淫實天道威權安足論所以於陵子桔槔
常灌園

落日渡黃河慨然念鄉國以彼數摺蒲泛此千里色迴
風扇狂瀾流蕩將何極緬惟濟川才令我長緘臆
青蓮發華池皎皎臨朝露含芳而洗潔冀君時得顧疑
霜中夜至淒風興瑤臺不見雙青鳥憔悴使心哀草木
有本性後時羞更出安能逐土遷如彼踰淮橘

過南樓感舊

南樓在小桐溪之上故相國陳素庵夫人徐氏舊居也夫人名燦字湘蘋少攻詩文精績事長短句尤爲世所稱相國得罪同徙遼左迨賜環後故第已不可復問遂卜居於此日惟長齋繡佛初不問戶外事人稱曰閣老廳北歲居人不戒於火堂廡悉成煨燼南樓巋然獨存暇日偶過其下感而賦四絕句

合歡樹底北風涼玉珮曾霑萬里霜
世外滄桑誰省識妝樓猶在魏公莊

玉軸牙籤浩劫紛幾家風雨閉蘭薰
自從一散天花後不遣慈雲惹絳雲

三五如花十二樓繁華多付水東流西風燕子歸來日

滿地秋瓜憶故侯

三五如花樓十二不堪多向死前空素庵感懷句也

雪後燕臺月滿池
闌燈風調擅當時而今更有何人在

傳得傷心幼婦詞

湘蘋以燕京元夜詞擅名于時著拙政園詩詞頃歲始爲之雕梓

春夕對庭梅寄所知

芳月闕良游蕭齋掩深竹
泠泠竹間風夜靜逾芬馥
感茲花似雪思我人如玉
殘月下西樓何時更同宿

吳興雜詠三首

弱魄迷歸路荒烟化寶釵
天涯寒食雨應到石蒲齋

右明霞墓

竹葉覆幽亭天生盛下若年年秋月明山鬼來偷酌

右窪尊亭

林密蟬逾噪溪涼雨忽飛田家知不遠浮鼻一牛歸

右雪溪

張芑堂明經寫柳陰垂釣圖見贈

二首

望裏孤雲逸興飛盟鷗狎鷺總忘機扁舟日暮歸何處
家在桐陰舊釣磯

虹橋秋柳自蕭疎著個烟波舊釣徒別有高懷誰會得

青山搖落雁聲孤

青山在
漱浦東

八月十五夜松陵對月寄懷祝兩亭孝廉都下

淪落天涯又水涯此身久矣信浮槎秋來甫里聲逾壯
月近垂虹冷自華玉罍流連思往事清砧哀怨屬誰家
知君薄醉荆高市坐看西山斗柄斜

十六夜虎邱寺玩月

流光不待客所失常俄頃誰知武邱山逸興尚可逞招
提雨初過月吐翠微頂迢然眷良宵迨此清境永崖巖
互顯晦湍瀨各分併天風掃巖挂綠雪平覆井我衣雖
云單未忍怨荒冷俯挹劒池流仰攀玉繩影開士音久
寂頑石呼詎醒坐來東峯上跡滅慮亦屏清猿爲誰啼
露鶴徒自警迴思昨宵時三五九端整不見捧心人蒼

手集卷之十一
烟故宮暝

吳門席上贈友人

要離塚畔解吳鉤，絕域歸來素髮稠。
老去龍媒餘伏櫪，時平燕頰失封侯。
金波自逐新游舫，白紵偏逢舊主謳。
莫惜尊前一沈醉，明朝分散五湖秋。

西溪晚渡

十月西溪水孤舟，共遠天斷雲孤嶼。
外斜目亂鴉邊地，僻驚風峭山高落石圓。
前程更何處，歷歷望炊烟。

冬日同杭堇浦先生及友人集翠璫館

白石巖扉問隱淪，堦前數笏更嶙峋。
蘿烟不拒投簪客，

竹月能畱臥舊人賭墅風流閒未厭銷寒情話晚逾真
西冷耆舊惟公在七子誰能步後塵

長河早發

范蠡塘邊客凌晨趣放船薄烟籠岸柳殘月淡湖天路
指征鴻外山橫曉鏡前東風最無力偏解別愁牽

六和塔

孤標撐遠空九級春嶽臬壯哉江天風萬里一掀揭苟
微大法王厥勢未易折緬惟經營初功與造化埒鑿根
第三泉作鎮雄兩浙蜂房環玲瓏蟻穴費瞰躡七星挂
北牖六月見南雪豈惟昏晝昧幾誤虹霓掣往者錢湖

龍風雨追列缺誤觸舍利光斬之以寸鍊祇今西陵潮
欲至轉鳴咽浮生幾飄蓬出處一螺蚌豈無掃塔衣此
志羌未決抽帆遲明發迴首空叫絕

六和塔本九級見咸淳臨安志

雨渡錢江却寄綠飲

飽挂輕帆出亂峯茫茫何處託離蹤銀濤打岸春三折
碧海粘天雨萬重脩禊蘭亭人已遠探奇宛委興徒濃
相知剩有孤飛雁尺素休辭一再封

鮑當以孤雁詩得名人稱鮑孤雁

富春

近游何處不沈吟至此真疑畫裏尋十幅曉帆依樹出
一江春水抱城深巖阿不改雲烟色霄漢空懸故舊心

祇有閒鷗知此趣浮沈隨意到如今

嚴陵夜泊寄懷祝夢花茂才雨亭孝廉

我交于祝獲二阮胸次常若橫湖江嗣宗狂瀾廻旣倒

仲容健筆鼎可扛有時矜才兩不下短兵突出相摩撞

戴山弟子

月隱先生

必有後得此亦足驚海邦憶昔過我飲

山館晶柁磊落堆羊腔悲歌擊筑屢屬和逡巡欲以偏

師降秋蘭結契青玉佩春草門雖花酒缸自從二子別

我去此物雖在塵滿窗而我飄萍無定在扁舟夜渡七

里瀧驚濤灑面夢不穩孤燈無焰青幢幢可憐越女天

下白袞絲急管隨隣艘人生意氣各有合蕭艾豈足知

離莊南陽真人昔未奮二蛇遊戲同慙慙一蛇爲龍東
入海一蛇掉尾西吟衽布衣之交古所敦足加帝腹夫
何憊劉郎長者本大度雲臺博士徒喧囂早知貧賤愈
富貴何如烟雨同耕耰山高水長春寂寂西臺老樹號
崆峒欲緘遠意問天末安得鯉魚時一雙

江行竹枝詞

二首

木蘭舟小撇波浮朝發衢州暮睦州直到錢塘分手處
與郎同賽廣陵侯

烏石灘頭送客風青山兩岸月當中郎行莫似隨潮燕
半夜西飛半夜東

始新追悼方心醇明經

邑小無城郭民居近百家春風多掩戶寒食自飛花鎖溪航斷魂歸壟劍斜傷心徐孺子襍被又天涯

一百五日新安道中寄內

熟食驚心道路長飛花無力點輕裝家山尚阻齊雲嶺生計真同上水航夜雨樓臺人臥病春風楊柳客思鄉明朝試膾蘭江鯉定有機中淚數行

暮抵屯溪

不見黎陽戍屯溪信可憐風花度寒食簫管咽春烟舊國粉榆社新筍玉几泉今宵拚一醉旅思豁江天

昆盧閣晚興二首

了無剝啄到巖扃，剩有雲山入畫屏。
十笏堂中疎磬寂，晚風隨意落空青。

閒攜茗椀傍香臺，雨過天青尚薄雷。
赤脚頭陀報何事，松蘿山上一旗開。

發下汝溪畱別宗人天衡

白岳秀南障，汝溪渺東注。
飄飄遠游子，駕言從此去。
舉足念鄉國，一步一回顧。
溪光送明晦，寒烟引輕素。
不見山中蕞，猶見山頭樹。
丁寧感父老，握手臨歧路。
勸我強加餐，慰我長相慕。
同姓古所敦，他人不猶愈。
所嗟良會

怪復此分張
遽東風作春陰
江雨晚飛絮
千載富鄉原
是我吞聲處

古城巖

一邱彷彿小蓬萊
半壁風雲亦壯哉
江日有情穿霧出
巖花無主背春開
客來放食跳朱鬣
僧引尋題埽碧苔
若問汪王當日事
六州兒女到今哀

題篁墩族人山樓

背倚蒼崖面石淙
一間危閣萬株松
憑誰繪我松窗下
看煞西南始信峯

宿浦口

夕浦維舟客悽然思不窮燈青疎雨外頭白亂灘中失
侶悲沙雁含辛習蓼蟲山城清漏斷五兩又乘風

晚過嚴陵

客星畱故蹟弭楫問江潯不見先生面空傷此日心祠
邊雙鷺下釣處一龍吟水遠山長意寥寥自古今

舟抵江干以沙淤不能登陸夜宿梵村悵然有作
東歸千里儼朝昏一舍無端限梵邨未必懷沙能病客
祇應剪紙忘招魂郊臺暮雨銷金弩鼃子春流壯海臺
爲謝西湖漁釣侶肯容清夢到芳尊

吳下贈書林錢景開

載酒論文詎偶然雲烟過眼興幽偏春風楊柳曾千古
夜雨江湖又十年宛委營生終遠俗琅嬛有路直通仙
何時小集羣賢了許我傳鈔劍石邊

南宋羣賢小集爲
臨安陳思所輯

拜經樓詩集卷一終

拜經樓詩集卷二

一起乙未
一盡丁酉

海寧 吳 騫 槎客

瘞錢行

海鹽金粟山南村名楊殿耕者於雷而後啓墾得古
錢甚夥間有雷斧雜其間錢皆趙宋年號予構得二
百餘枚土花繡錯極可愛玩惜不知何時所瘞賦此
以遺好事者

軒葛立幣傳尊盧九棘爰開太昊墟高陽事與馨貨遠
虞庭策馬何班如伐山鑄金代則有貴通百物流五都
豈如末世乃成癖索腐貫朽爭守奴甚或塤埋作金穴

猶希沒齒私之孳生不布施死含珠多藏厚亾理豈誣
金粟山南金牛北往往寶氣騰扶輿人弗能知鬼先覺
俄聞燕口雷轟車茂先雖志霹靂楔未言解作揮金鉏
耕夫蛾集鮐婦笑羣言天賜聲歡呼生砂活碧千萬計
臨風盡作蠓蠓蚨銀灣野老亦好事以今易古當五輪
予以今錢五易古錢一宋有當五折十錢攜歸笑倩姹女數生計平添二百
餘晴窗細檢開紙裹黃牛白腹勝五銖紀年略備宋一
代百三十五形模殊錢譜宋朝錢凡一百三十五樣惜無臨安鈐牌樣
三寸紅綃垂鑰魚孔行素至正直記宋季銅鈐牌長三寸鑄臨安府字有取爲鑰匙牌者
聊同卽墨二吉化常充坐上賓朋娛子舊藏卽墨吉化二每爲鑒古所賞

轉憶當年瘞此客。幾看華屋成榛蕪。傾身尚爾思障簾。
癡魂未化神先祖。昨夜夢中忽告我。慎勿嗤笑愚夫愚。
君不見鄧通鑄錢富敵國。幾曾持一歸黃壚。

郭溪秋泛同仲魚

二首

高梧初葉下。爽氣滿銀灣。偶此同移棹。殊勝各閉關。
晚風雲際雁。秋色雨餘山。永憶江湖上。誰如爾我閒。
陰蟲何切切。溪路轉悠悠。書劒無長策。琴尊耐薄游。
簾垂秋水店。人倚夕陽樓。好是蘇溪裏。清歌緩客愁。

臨平道中和仲魚韻

二首

瓶山秋色正蒼然。一抹微霞帶遠天。映得芙蓉人面好。

晚涼初倚缺瓜船

萬慮含毫已渺然
滄波同占白鷗天
多情黃鶴應相笑
歲歲秋風一釣船

喜盧弓父學士歸自白下二首

昔懷江左聯絲轡

往與鮑君以文相約
渡江奉訪以事未果

今向山中間草

堂書帶欣承萱露色
詩囊欲解雨花香
閒看鷗鷺來溪上
不遣功名到枕旁
早晚西風鱸可膾
扁舟容與待滄

浪

時有過訪
衡茆之訂

光嶽英靈海鶴顏
風流文采詎能攀
學探馬鄭諸儒後
名在王楊四子間
忽漫思親回遠棹
悠然采菊見南山

林泉自此窮高致青瑣從教改舊班

酬槎客見投原韻

二首

餘姚

盧文弨

與君相見非今日千里神交卽一堂滿徑莓苔來舊
雨凝塵几席染荀香信知人是羲皇上便想居依欄
釵旁蝨穴蟬窩諧夙好燂枯酌醴話宵長

抽簪聊得洗塵顏諸老成人悵莫攀忽覩瓊枝標意
外宛如明月入懷間羨君杞梓堪爲棟異我邱陵不
至山况有驪珠能耀握未應香艷較輸班

西湖秋泛呈弓父學士

方舟夙有期戒楫始湖朔悠悠延遠風宛宛乘初旭清

漪乍淪漣蒼靄森綿邈離披葭菼淅瀝霧露沐采藻
歌尚緩攀杜情彌屬俄驚白鷗眠徐恣青山矚岡廻境
轉紆林掩岫疑複仰看一線泉裊裊瀉寒玉超遙遂忘
疲曠攬隨所觸潭連泣衰紅園篠暗瘦綠晚蘭知幾滋
巖桂浩已馥緬茲歲月遷喻彼鳥過目撫往跡易陳懷
來理可燭流連觀物情疇能事羈束江山矧靈秀風物
日以肅幸陪謝公屐得攀羣彥躅巖穴無異尚琴觴盡
款曲日夕澹忘歸何妨烟外宿

一槎客招同人集湖舫卽席

盧文弨

日車不可挽惜此炳燭光還期好朋儔與我相扶將

舊交詎云寡出處各異方願言結新知六籍諧笙簧
但恐衰鈍棄莫與比翼翔倦游歸故里孑然一身藏
有美延陵子聞名夙所詳相距百里遙引脰時徬徨
秋風吹七尺逕來登我堂傾蓋成莫逆令我喜欲狂
一洗世俗塵神采自飛揚更出一卷詩土風咏海昌

蠡塘雜咏

蹕路揚皇靈耆詰亟表章遺事拾瑣細雅故

埤三蒼嗟諷再三過冰雪沁中腸以茲華國選宜置
瀛洲旁伏處擁萬卷不羨名利場探奇扶豕壁析義
窮元裒樂過南面樂於子計誠良以子尤癖古氣誼
無參商邀我湖上游形骸略可忘更攜潁川子英英

比圭璋復觀冠玉姿矯矯蘇家郎同岑合三五清談
間行觴湖波淡落日餘興猶激昂期子證同異期子
質短長惜哉不同開明當理歸艗後期定何時浙浙
天雨霜一年幾聚首快若披曹倉衰年轉多幸前負
差可償披寫遂成咏墀下吟寒釐

同作

海寧

陳

鱣

仲魚

閒攜尊酒上輕舟幽意真堪共狎鷗四海交情猶有
客重湖烟景正宜秋山分黃葉歸吟卷水漾紅霞入
畫樓好與風光流賞徧人間何必更丹邱

侍家大人陪諸公集湖舫卽席

壽照

南輝

初陽臺上構桑楸射破重湖烟水昏青峯稍稍露秋
髻白榜一一辭湖門峯迴棹舉不覺遠景物旋隨圖
畫轉三橋柳絲魚可貫十里秋荷霜未剪烹魚作羹
荷作裳漫聽楚調歌滄浪題襟問字興方劇開尊吸
盡全湖光涼風蕭蕭動城角僂指登高期在目他時
陪祀水仙王更泛延年幾叢菊

同人湖隄晚步

二首

葉滿蘇隄柳拂沙水天閒話夕陽斜誰知曲院無人處
猶有殘荷一兩花

晴霞吹散滿天金點點西風下渚禽卻愛幽亭居木末

勒回湖勢作秋陰

橫河舟次仲魚出元槩本左克明古樂府其讀卷
首有玉璫瓏閣圖記蓋龔蘅圃侍御故物也蘅
圃舊居卽在橫河之側玉璫瓏本宋花石綱石
今尚無恙而居趾則數易其主矣仲魚索詩漫
題其後

射洪手持書一卷諦審乃是田居藏簾窗相與吟且泛
悠悠直至橫河旁河濱遙指千章樹中有玉璫瓏閣處
碧瓦朱闌照夕陽牙籤緗帙縱橫布夕陽奄忽下西山
異書流落還人間鄴侯三萬手未觸買得翻教增浩歎

神仙不待脉望變兒孫迸共烟雲散祇道門庭尚如昔
誰知幾易新臺觀盛衰倚伏果何常此闌此書空斷腸
憑君更製新樂府與唱瑤瓏花石綱

晚自東新關至桐破道中卽事

襖被東歸客征途暝色邊石鳴驚戍鼓山靜想神絃浦
荻秋藏屋橋燈夜聚船不堪重廻首文酒昨流連

峴山早起

微雨歇篷窗南山春未曙惟聞湖上禽不辨湖中樹早
有捕魚人鳴榔入烟去

吳興道中

清遠溪山婀娜。帳十年淪落舊青衫。垂髫一去河亭廢。
欲把閒情取次芟。

武原過雙桂堂追悼兄女寄徐郎閩中

二首

寒食棠梨照畫樓。一杯誰與酌荒邱。泉臺若有懷人泪。
應共秦溪入海流。

徐淑空閨破鏡塵。謝家飛絮幾回新。似聞風雨魂歸夜。
猶擲金釵卜遠人。

雨夜同陳雲喈宿補軒

蕭條孤館夕。急溜鳴前檐。煩襟一以滌。陡覺秋風尖。倦
葉溼不飛。斷蛩哽幽潛。賴有素心侶。釋我意所嫌。瑤徽

罷三弄玉子收兩匳坐忘銀葉冷臥信更籌添擁衾向
冰簟何異蝸壁黏卻憐數飢鼠嘖嘖鳴幃幃齒牙誠已
利口腹胡不廉徬徨瞰四壁一燈淡欲燼勞人分少寐
此懷想君兼況乃牽物役奔迫愁烏蟾攬衣遲明發尚
恐仍廉纖豪氣損陳登別淚滋江淹安能長不離如彼
鰈與鷁

夏日同人集宗陽宮沈鍊師房次堇浦先生韻

江天遲炎曦停午景尚黝飏然古靈宮璫瓏敞疎牖玉
芝產丹房大藥成不苟於以佐長生劣可邁黃耆先生
霞外人探索窮九有偶此陶幽襟一洗裙屐狂譬如青

蓮花能吐衆妙口暇復招列仙玉壺買春酒谷神元不死奚事庚申守

三月晦日臨平道中贈祝士希茂才

長河西望翠成堆薄暮飛花滿岸苔數摺帆連烟樹出一痕山斷鼎湖來鷗閒任觸瓜皮艇風冷休辭竹葉杯多少送春筵畔客誰知飄泊有斯才

哭選兒

空餘嬌淚滿重茵不見童烏稚齒新此日轉傷吾作客昨宵猶道汝爲人桃憎醜面花偏好夢感遺書事已陳兒生時頗有宋子京之瑞故小字曰選試向空王尋覺路爭教小劫抵窮

塵

長夏病熱偶憶荆南舊游成七絕句

陽羨溪山我舊諳
天教風景擅江南
買田曾到坡公處
一片閒雲護碧潭

憑虛閣上暝烟馳
秋月開林鳥未知
夜久何人吹簫笛
數聲飛出上龍池

巖扉晝闢草蒙茸
鶴跡多於過客踪
日暮前峯知有雨
白龍又挂赤崖松

襄王嶺畔朝尋藥
離墨山中晚飯僧
濯足長流欹短幘
烹茶六月斧層冰

接天荷芰影扶蘇
水榭新涼散浴鳬
欹枕風船過一夜
未應此樂讓西湖

脩竹林中篤耨香
題詩且坐贊公房
建炎往事君休問

半逐金仙墮渺茫

金沙寺有岳武穆駐兵時題壁詳雲麓漫鈔

窅窅陰房乳滴稀
森森玉筍已成圍
琅函讀罷塵心了
蛺蝶何須化綵衣

陳目耕茂才出玳瑁酒杯索詩戲占二首

瓊豔真堪壓酒鎗
文章端足誤浮生
如何甲子修齋後

無復乘潮上古城

桂海虞衡志玳瑁遇甲子庚申日則不食俗謂之玳瑁齋

文甲依稀數十三
玉珰海月舊朋簪
如今付與陳驚座

啞不忘故吁嗟吳王柰邱墓

梅花

春來紙帳邊夢斷空山裏綠雪漲山橋銀蟾一溪水

烈婦吟

婦陳氏山東人睦州守趙公起杲姬也公得暴疾卒
於官烈婦卽日殉焉葬於郡東桃花塢

青青百尺桐枝葉空紛披哀哀彼烈婦視死忽如歸憶
昨離青齊行行指吳越當君牽絲辰是妾委身日升堂
辭阿母再拜慘不歡戚里共來集遠送之河干使君從
門來車騎何雍容結以青玉珮貯以綠綺窗室中何所

有錯落難具陳流蘇八寶帳四角垂錦茵頭上金雀釵
耳著明月璫初七及下九挾瑟上高堂高堂深且廣參
差蘭蕙發浮雲從東來白日忽西沒之江不可逾五馬
徒踟躕君命畢茲夕妾生當何如掩我妝時鏡著我嫁
時衣渺焉一孤魂誓言長相依骨埋桃花鵝血染桃花
土桃葉復桃根誰知我心苦

慰胡秋讀悼亡姬

僂指芳時度幾巡東風狼籍重含辛薜蘿小院春歸燕
蛛網高樓晝少人夢裏渾忘朱字語歌殘猶想畫梁塵
少君自負千秋術不爲陳王致洛神

晚過南湖

渺渺城南路，瀰瀰野水邊。
殘荷妨睡鳥，高柳抱疎蟬。
日落烟橫島，漁歸笛滿船。
似聞秋水閣，老屋尚支天。
秋水閣盛宜山先生所築

龍門山晚眺

百折丹梯鳥道旁，龍門落日迴蒼蒼。
危峯石裂雲多變，幽壑年深樹有香。
事往湖樓歌管歇，秋來野寺佛鐘涼。
還舒不盡登臨眼，直送江潮過禹航。

湖隄閒步

經時不縱湖隄眺，千頃依然碧玉流。
浙浙丹楓斜背日，

田田荷葉半殘秋紅墻舊繞王孫苑綠黛新空教伎樓
擬挈偏提重買醉栖雅蕭瑟使人愁

宿報國院

月影斜侵薜荔墻鐘聲迢遞出雲廊二分烟水三分樹
併借西窗五月涼

讀開寶遺事

華萼樓中夜讌回麗山宮闕正崔嵬舞成天上霓裳序
吹徹人間阿濫堆月照華清湯尚暖鈴淋閣道雨偏哀
吞聲最憶江頭老歲歲花開一度來

固碑歌

國碑空團團不救斯民飢江東末造昔爲此孫郎事業
蓋已微由來在德不在禪七十二主安可希况乎皓也
尤酷烈鑿眼剝面紛鉤錢萬民咨怨了弗顧所在爭說
祥與機司空臣朝往被命吳志天璽元年遣兼司徒董
國山而碑中僅載董朝蓋處皇華駟牡歌駢駢培塿固

實不預辨詳予國山碑攷

可作梁父饗餐何必非垂衣到頭神語竟杳嘿徒令山
鬼相嘲譏我因暇日理芒屨聊乘逸興窮烟霏眼明驚
見詫異跡勢猶神駿乍脫鞵斯也小篆邈也隸星斗錯
落含珠璣凸中隱曳蠶尾瘦凹處翻成蝌蚪肥年深剝
蝕容詎免姓氏幸畱臣建揮旂蒙協洽受天璽千五百

載同朝晞徘徊弔古徒累欷下視松櫟皆十圍安能撼
雲作覆蓋不教埋沒儕妃豨君不見嶧山之碑野火燒
岐陽獵碣瓊還包又不見建業城邊石數段故宮禾黍
秋風號當時若能保此園猶勝三馬食一槽

雲間陳用舟茂才別久矣近聞歸自楚中寄懷

二首

平生陳仲子契闊竟何如萬里徒相憶三年豈定居遺
民江表傳旅食武昌魚不謂依劉計翻成痛腹餘

用舟素爲

故楚撫李
崔峯所知

尺素經時達空梁正月明腰疑歸楚瘦詩喜入吳清汐
浦招同釣秋田夢耦耕斯游何日遂千里

湖名一帆輕

續固碑歌

離墨雲中手可招銅官勢與蒼天高封禪之碑森鼎峙
巍然特立西山尻繼周八代多爭戰漢武秦皇恣荒晏
海上神仙久見欺封中白雲空若練東家曠效東吳子
羅列鳳麟同犬豕碑中敘述瑞應凡千二百有奇碑版流傳好事家歐
趙曾書金石史爾來又經幾百年山頭草木蒨撐天雨
淋日炙樵牧毀無人收拾理則然細觀字跡疇能匹飛
舞真同皇象筆袁昂書評皇象如音韻繞梁孤飛獨斷舞書史會要稱蘇建書與皇象同
圭零壁逾可珍玉筍銀鉤轉蕭瑟卻憶開基快事多江
東功業未蹉跎火燒赤壁阿瞞走曲顧紅顏公瑾過繁

華轉瞬英雄老贏得兒童閒鬥草大江東去浪淘沙虎踞龍蟠何足道石頭城下散朦朧周處廟前西日紅可憐一片山頭石至今猶怕水中龍

錢塘舟夜有懷

西風城下水潺潺何處衰楊尚可攀遠服催成傍舍杵
畚田燒盡隔江山三更玉笛聲偏苦萬里瑯戈客未還
但使當時銅馬在免教少婦怨刀鋌

送呂耕山表兄歸散浦

學得成連海上琴可能斯世有知音一朝長嘯東歸去
九十九峯烟雨深

春日自桃溪泛舟至澗北

凌晨獨自櫂輕航
隨意春游遠不妨
日暖雲溪添罨畫
雨餘烟柳剩啼妝
叢祠背嶺宜蠶卜
社酒連家喚客嘗
自是武陵人未識
桃花元不誤漁郎

微雨曉渡太湖望靈巖諸山

篷窗幾點社公雨
催抹烟螺半未勻
畢竟西施曾住處
宮花先放一枝春

寄雲林學道者

雲林有高士古綠瑩眉髮
濯足冷泉中還山常不韞佳
期坐超忽湖上餘芳歇
猶憶枕琴眠風吹夜船月

過表忠觀

二首

玉貌依稀石鏡前
殘碑風雨自年年
宋家宮外垂楊柳
半作飛花落海天

小樓一闕不勝春
回首江南野史新
猶喜生孫無豔筆

免教巷哭到州民

錢俶納土於太平興國三年南唐後主卽以是歲賜牽機藥詳龍衮江南

史野

臯亭觀競渡示祝雨亭

四首

六柱烏篷棹曉雲
桃花鴨畔水烟昏
從教伐盡張華鼓
何處還招屈子魂

榴花如煞石榴裙
人影衣香兩岸分
曲港裁收鶯鶯隊

前溪又試絕流軍

澧蘭沉荳寒中止白馬銀濤擁上游會得彭咸千載意
吳頭楚尾一般愁

玉簫金管鎮畱連細雨斜風溼翠鈿但祝長隨崇善妹

年年波上聽神絃

皋亭有七娘子廟相傳爲東晉陳頊妹頭嘗使北不屈節斷一臂而歸卒

封崇善王見
咸淳臨安志

喪元勇士墓

勇士盧姓名象禎宜興人總督象昇從弟也盧世居
桃溪崇禎癸酉天罡賊起比戶焚掠象禎時年二十
餘素有膽略率鄉兵禦之甫出東州門賊鋒銳甚鄉

兵皆懼怯無一繼者象頑直前格鬥力屈首斷於賊
屍屹立不仆轉步入柵賊驚以爲神遂遁去里人葬
之獨山下碣曰喪元勇士之墓或云婦張氏亦殉節
死

荆南萬山中合沓崖巖複桃溪一隅地生聚詎云足每
時當蠹動草竊此蚶蛸往者明末造臺社蕩將覆狐鳴
而鬼火厥焰誰能撲名城不難隳燎原益恣毒矧茲墟
落間柴門對老屋賊蹤眞鬼如指顧徧厓谷發邱揚白
骨摸金剔紅髑血肉飽烏鳶生死同一哭勇士氣勃然
別婦起結束兜鍪鍔柄襜光耀銀纏稍徑啟東州門奮

身誓前角是日天蒼茫鉦鼓聲斷續陰風凝殺氣慘結
空中電回視鄉里兒屏息同猊縮於乎一敵萬此事君
所獨首雖落賊手足顧仍我屬折旋還故步遺軀免汚
辱賊膽固已碎卻走自相觸始知死勇士能保生邦族
寄言謝督師阿奴詎碌碌悽愴中書君急難痛無復一
門爭義烈千載炳簡牘我來獨山下懷古淚盈掬秋風
激墓門白日益淒肅園荒石友青草沒謝池綠惟聞共
命禽飢啄韓憑木

石友堂在忠肅公淵隱園

巢燕歎

翩翩紅襟燕身輕尾涎涎竝棲文杏梁雙宿瓊花院春

檐雨露深生子頗爛漫毛羽雖未成出入解相戀一朝
失其母啁啾徹昏旦雄飛顧徘徊寸腸爲之斷偶出得
新雌呢喃青玉案宛彼絃續膠相和音弗變衆雛各驤
首謂母兮再見歡然共一窩情好故無間撫哺必均一
愛護罕後先夫何日顙顙毳脫飲啄倦旬日相繼死一
一擲巢畔旁觀初莫解頗爲增惋歎試令剖雛脅纍纍
若珠貫撐腸盡旁通也葵藜芒刺劇刀箭乃知用意深衆
命歸一算賢雄終不悟比翼方繾綣育卵復拖雛毛成
各飛散

長水道中

望望古由卷悠悠離思牽溪紆停野棹城遠入春烟乍
轉鶯簧澀長嘯柳眼穿鴛鴦知客恨休放晚風顛

文漁自平江歸以水仙分餉戲酬

二首

前身花月張三影落魄江湖未易才昨夜館娃宮畔過
扁舟偷載藐姑來

西館相逢夜已闌背人如訴轡羅寒吳郎亦是陳王客
未敢燈前仔細看

山居卽事

烟霞陽羨里冰雪畫溪山自昔懷仙隱何時化蝶還樵
林鹿爲友支隴石當關若問巢居業冥棲一世間

哭善臥兒二首

髯也風流解撼龍探來河洛盡微蹤一鎧未滅飄然去

身在天台第幾峯

兄善青鳥及數理之學嘗夢神人召爲天台錄事疾革時見有蓮燈前導

而逝

赤城人去不重回玉洞緋桃到處裁底事憑君須掌錄

無過花落與花開

時兄有姬人前沒

明妃出塞圖

黃狐歡欣白狐哭天山野鷹飛撲撲雙旌欲前還復卻
後有佳人面如玉廟堂勝策在和親不用將軍用妾身
荒荒白日銷兵氣漠漠黃沙掩鬢脣紫驪馬上西風大

淚染邊花猩血破誰能更買畫工來青塚平原圖一箇

拜經樓詩集卷二終